

**Uunga siunnersuut: Inissiani attartortittakkani ineqarnermut tapiissutit pillugit
Inatsisartut inatsisaat nr. xx xx xx 2015-imeersoq**
*(Ilaqtariinnermut, Naligiissitaanermut Isumaginninnermullu Naalakkersuisumit
saqqummiunneqartoq)*

pillugu

Ilaqtariinnermut Peqqissutsimullu Ataatsimiitaliap isumaliutissiissutaa

Siunnersuutip aappassaaneerneqarnerani saqqummiunneqartoq

Ataatsimiitaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Tillie Martinussen, Demokraatit, siulittaasoq
Inatsisartunut ilaasortaq Agathe Fontain, Inuit Ataqatigiit, siulittaasup tullia
Inatsisartunut ilaasortaq Jess Svane, Siumut,
Inatsisartunut ilaasortaq Laura Tàunâjik, Siumut
Inatsisartunut ilaasortaq Ineqi Kielsen, Siumut
Inatsisartunut ilaasortaq Ane Hansen, Inuit Ataqatigiit
Inatsisartunut ilaasortaq Mimi Karlsen, Inuit Ataqatigiit

UKA 2015-imi ulloq 8. oktober 2015-imi siullermeerinerup kingorna siunnersuut ataatsimiitaliamit sukumiisumik suliarineqarpoq.

Siunnersuutip imarisaa siunertaalu

Inissianik attartortittakkani ineqarnermut tapiissutit pillugit Inatsisartut peqqussutaat nr. 3, 31. maj 2001-imeersumut taartitut ataatsimoortinneqarluni nutaatut siunnersuutaavoq.

Ineqarnermut tapiissutinik naatsorsuinermi tunngavissatut maannakkut aningaasarsiat aallaavigineqarnissaat siunnersuutikkut qulakkeerneqassasoq Naalakkersuisunit oqaatigineqarpoq.

Aammattaaq Naalakkersuisut paassisutissiinerat naapertorlugu, attartortitsisartut inissianik attartortitsinermi akinik pissusissamisuunngitsumik akinik qaffasinaarinikkut aningaasatigut

attartortitsisut iluanaaruteqarniarsinnaanerat naapertuutinngitsut
iluanaarniutigineqarsinnaasullu peerneqarnissaat siunnersummi siunertarineqarpoq.

Naapertuutinngitsut iluanaarniutigineqarsinnaasullu taamaattut pinngitsoortinniarlugit erseqqinnerusumik maleruagassiornissaq Naalakkersuisut nalunaarutikkut iluarsiissuteqarfigilersarpaat, tassani aningaasarsiat killissarisaat, nammineq akiliutissat aamma ukiumoortumik ineqarnermut tapiissutinut aningaasat minnerpaaffissaat annerpaaaffissaallu pillugit aalajangersakkanik sukumiinerusunik aalajangersaasoqarsinnaassalluni.

Siunnersuutip Inatsisartuni siullermeerneqarnera

Saqqummiussisutip Ilaqtariinnermut, Naligiissitaanermut Isumaginninnermullu Naalakkersuisumit saqqummiunneqartup saniatigut partiit oqaaseqartartui Siumut, Inuit Ataqatigiit, Demokraatit aamma Partii Naleraq allakkatigut saqqummiussaqaarput.

Aningaasaqarnikkut sanngiinnerusut inissiani attartortittakkani najugaqaannarnissaminnut akissaqarnissaat qulakteerniarlugu isertitat apeqquaatillugit ineqarnermut tapiissutinik aaqqissuussineq aningaasatigut tapersiissutaassasoq Siumup oqaatigaa. Aammattaaq aaqqissuussinermi atuuttumi iluanaarniutaasinnaasut peerneqassasut Siumup erseqqissaassutigaa.

Siunnersummi pingaarnertut siunertarineqartut marluk Inuit Ataqatigiit tapersorsinnaavaat, tassaasut maannakkut aningaasarsianut naatsorsueriaaseq aammalu inatsimmi atuuttumi iluanaarniarsinnaanissamut tungasut. Siunnersuutip utoqqalinersialinnut aamma siusinaartumik pensionisialinnut tunngatillugu aaqqissuussinermi suliamut atasutut isigineqarnissaa Inuit Ataqatigiit naatsorsuutigisimagaluarpaat. Siunnersuutip piissakinnerusunut pitsaanngitsumik kinguneqarsinnaanera Inuit Ataqatigiit ernumassutigaat.

Ullumikkut isertitanut sanilliullugu ineqarnermut tapiissutit qulaajärneqarnissaat Demokraatininit tapersornerqarsinnaavoq. Periuseq atorneqarsinnaasariaqarpoq allaffissornikkullu nanertuutaanani. Maleruagassat, taasunga ilanngullugu innuttaasut paasissutissiisussaatitaanerat innuttaasunut paasisitsiniaanikkut paasissutissiisutigineqassapput. Ineqarnermut tapiissutit iluanaarniutigineqarsinnaajunnaarnissaat partiit allat assigalugit Demokraatininit tapersornerqarpoq. Aammattaaq utoqqalinersiallit aamma siusinaartumik pensionisiallit ineqarnermut tapiissutisiaqalernissamut periarfissinneqarnissaat eqqumaffigineqartariaqartoq Demokraatit oqaatigaat.

Tamanna tunngavigalugu siunnersuut Ilaqtariinnermut Peqqissutsimullu Ataatsimiititaliami suliarineqartussanngorlugu innersuussutigineqarpoq.

Tusarniaanermut akissutit

Makkununnga ulluni 15. maajimiit 19. juni 2015-imut siunnersuut tusarniaassutigineqartoq siunnersuummi allassimavoq:

Naalakkersuisup Siulittaasuata Naalakkersuisoqarfia, Peqqissutsimut, Naalakkersuisoqarfik, Aningaasaqarnermut Naalakkersuisoqarfik, Aatsitassaqarnermut Naalakkersuisoqarfik, Inuussutissarsiornermut, Suliffeqarnermut Niuernermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ilanniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Pinngortitamut Avatangiisinut Inatsisinullu Atuutsitsinermut Naalakkersuisoqarfik, Ineqarnermut, Sanaartornermut Attaveqarnermullu Naalakkersuisoqarfik, KANUKOKA, Isumaginninnermut Naammagittaalliuuteqartarfik, Kommunit Kukkunersiusui, Kattuffik Utoqqaat Nipaat, Kalaallit Nunaanni Inuit Pisinnatitaaffii pillugit Siunnersuisoqatigiit, Dansk Institut for Menneskerettigheder, Inooqat, MIO, IMAK, AK, NUSUKA, SIK, PIP, Sulisitsisut, ASG, PPK, KNAPK, Agerskov Consulting, GrønlandsBanken, BankNordik, Grønlands Revisionskontor A/S, EY Grønland, INI, Iserit, Qaasuitsup Kommunia, Qeqqata Kommunia, Kommuneqarfik Sermersooq, Kommune Kujalleq.

Tusarniaanermiit makku akissuteqarsimasut ilisimatitsissutigineqarpoq:

Inuit Pisinnatitaaffii pillugit Instituti, Kommunit Kukkunersiusui, Isumaginninnermut Naammagittaalliuuteqartarfik, Inooqat, SIK, KANUKOKA, MIO, IMAK, PPK. Ineqarnermut, Sanaartornermut Attaveqarnermullu Naalakkersuisoqarfik, Qeqqata Kommunia, Qaasuitsup Kommunia.

Ilanngullugu siunnersuummut oqaaseqaatissaqaratik makku ilisimatitsissutigaat:

Inuit Pisinnatitaaffii pilugit Instituti, IMAK.

Tusarniaanermi akissutigineqartut ataatsimiititaliamit tusaatissatut tiguneqarput.

Inatsisissamik nalilersuilluni ataatsimiinneq apeqqutillu

Siunnersummik siullermeerinissaq sioqqullugu siunnersuutip inatsisitigut nalilersorneqarnera ataatsimiititaliap ulloq 6. oktober 2015-imi saqqummiuppaa. Ataatsimiinnermut matumunnga allakkatigut nassuaat 22. oktober 2015-imeersoq, matumani ilanngullugu ataatsimiititaliap apeqquteqaatai **ilanngussaq 1-itut** ilanngunneqarput.

Ataatsimiititaliap siunnersummik suliaqarnermini atugassaminik apeqqutinut arlalinnut akissuteqaqqullugu ulloq 19. oktober 2015 Ilaqutariinnermut, Naligiissitaanermut Isumaginninnermullu Naalakkersuisoq qinnuigaa. Ataatsimiititaliap apeqqutaasa Naalakkersuisullu akissutaata assilineri isumaliutissiisummi matumani ilanngussaq 2-t ilanngunneqarput.

Ataatsimiititaliap siunnersuummik suliarinninnera

Inissiatigut tigummiinnarnissaata qulakkeerneqarnissaa siunertaralugu inissiani attartortittakkani inoqutigiippassuarnut ineqarnermut tapiissutisiaqarnissamut periarfissaq annertuumik pingaaruteqarpoq. Ineqarnermut tapiissutit isumaginninnikkut anguniakkanut sakkussaapput inuiaqatigiinni aningaasaqarnikkut pitsaanngitsumik inissisimasut najukkaminniiginnarnissaat siunertaralugu isumaginninnikkut aningaasatigut ikiorsiissutaasussat. Ukiuni kingullerni malittarisassat atuuttut ilaatigut naapertuitinngitsut politikkikkut eqqumaffigineqalersimavoq.

Siunnersuummi matumani tunngavilersuutigineqartoq ataatsimiititaliamit ataatsimut isigalugu tapersorsorneqarpoq. Ineqarnermut tapiissutit annertussusaat inoqutigiit ullumikkut isertitaannut naapertuunnissaat tapersorsornartuuvoq.

Ineqarnermut tapiissutip iluarsiivigineqarnissaanik politikkikkut kissaatigineqarnera taamatuttaaq tapersorsornartuuvoq, taamaalilluni ineqarnermut tapiissutinut tunngatillugu iluanaarniutit tamarmik suujunnaarsinneqarsinnaaniassammata. Taamaalilluni ineqarnermut tapiissutit attartortsisartunit ineqarnermut tapiissutinik iluanaarniuteqartartunit ineqarnermut akiliutinik naapertuitinngitsumik qaffasissusiliisartunit imaluunniit inissiamik iluanaarniutigalugu aaqqissuunneqartunit iluanaarniutaassanngillat. Aammattaaq ineqarnermut tapiissutit ineqarnermut akiliutinik naapertuitinngitsumik qaffasitsiteqataassanngilaq.

Inatsimmi atuuttumi naapertuitinngitsut iluanaarniuteqarsinnaanerillu oqaatigineqartut pinngitsoortinneqarnissaat siunertaralugu ineqarnermut tapiissutit pillugit inatsisitigut suliniuteqarneq manna Ilaqtariinnermut Peqqissutsimullu Ataatsimiititaliap sivisuumik utaqqisimavaa. Ineqarnermut tapiissutit pillugit najoqquassiit sukateriffigineqarnissaat pilersaarutigineqartoq Isumaginninermut Naalakkersuisuusimasup oktober 2009-ili nalunaarutigaa. Tamanna pivoq “angajoqqaarpaalussuit meeqqaminnut inissianik pisisarnerat”-nik taasamik ineqarnermut tapiissutit pillugit malittarisassat aqqutigalugit annertuumik aningaasalersuisoqartoq tusagassiuutitigut oqaatigineqarmat. Angajoqqaarpaalussuit meeqqatik ilinniagaqartut inissianik pitsittarpaat, taamaaleriarlutik meeqqaminnut taakkununnga attartortittarlugit, taamaaliornermikkut inissiamut ataatsimut qaammammut ineqarnermut 5.000 kroninik pissarsisarlutik.

Aamma 2012-imi tusagassiuutitigut oqaatigineqarpoq Nuummi ilinniartut najugaqarfiiunik akikitsumillu najugaqartitsisinnaasunik amigaateqarnerup kingunerisaanik ilinniagaqartunut ineqarnermut annertuumik akiliuteqartitsisoqartartoq. Ineqarnermut akiliutit qaffasissut ineqarnermut tapiissutinit pissarsiariuminartunit attartortsisartunullu toqqaannartumik tunniunneqartartunit ilaatigut aningaasalersorneqarput. Ineqarnermut tapiissutinut

attartortitsisumit pissarsiarineqarsinnaasunut sanilliullugu ineqarnermut akiliutit annikillisinneqartarnersut qulaajarneqarsimannngissorinarpooq.

Ilaatigut iluanaarniarerit pinngitsoortinniarlugu ineqarnermut tapiissutit pillugit inatsisip maanna iluarsiivigineqarnissaa sooq ukiuni taama amerlatigisuni ingerlanniarneqarsimanersoq ataatsimiititaliap nassuaatissarsiniarsimannngilaa. Taamaattoq maanna suliniuteqarniarneq ataatsimiititaliamit ataatsimut isigalugu nuannaarutigineqarpoq.

Ataatsimiititaliap siunnersuummik misissuinera

Siunnersuut 17-inik paragrafeqarpoq kapitalinut 7-inut agguarneqartumik.

Kapitali 1 Aalajangersakkat nalinginnaasut

Siunnersuummi §§ 1 aamma 4 saqqummiunneqarnermittut iluseqartut pisariaqartutut ersarikkaluarput. Inissianik attartorneq pillugu maleruagassanut innersuussinermut isumaqarpiannngitsumut taarsiullugu siunnersuummi inissiat attartortittakkat suut pineqarnersut nassuaatini ersarissarneqarsimanissaat tulluarnerusimassagaluarpoq.

Taamaattoq siunnersuummi § 1 innersuussutigalugu; taanna malillugu ineqarnermut tapiissut inoqtigijinnut inissiani attartortittakkani inatsimmut atuuttumi ilaatinneqartuni najugalinnut taamaallaat tunniunneqarsinnaallutik; inissiat attartortittakkat aalajangersimasut ineqarnermut tapiissutinut mattunneqarsinnaanersut ataatsimiititaliamit eqqartorneqarpoq. Matuman assersuutigalugu taakku tassaasinnaapput inissiat namminersortunit attartortinneqartartut, Namminersorlutik Oqartussanit kommuninilluunniit pigineqanngitsut aammalu iluanaarniutigineqarnerinik ilisimasaqarfigineqanngitsut.

Ineqarnermut tapiissutisisinnaanermut atatillugu inissiat attartortittakkat pillugit inatsimmi atuuttumi inissianut attartortittakkanut killilersuisoqarnissaa maannakkut kissaatigineqanngitsoq sukumiinerusumik oqaloqatigiinnermi ataatsimiititaliami isumaqatigiissutigineqarpoq.

Siunnersuummi § 4; taanna malillugu taamaallaat ineqarnermut akiliutinut ineqarnermut tapiissuteqartoqarsinnaalluni; malittarisassanik atuuttuni ingerlateqqiinerummata ataatsimiititaliap erseqqissaatigissava. Taamaalilluni assersuutigalugu innaallagissamut, imermut kiassarnermullu (atuinermi) aammalu atuinermi akiliutinut ineqarnermut tapiissuteqartoqarneq ajorpoq.

Siunnersuutip suliarineqarnerani siunnersuummi aamma imermut kiassarnermullu matumanilanganngullugu qularnaveeqqusiiinermut akiliutit siunnersuummi aamma ilangunneqartariaqarluarnerannik oqartoqarmat siunnersuutit taakku siunnersuummut akitsorsaataasussat ataatsimiititaliami immikkut oqaluuserineqarput.

Ineqarnermut tapiissutit taamaallaat ineqarnermut akiliutitut tunniunneqartarnissaat sukumiinerusumik oqaloqatigiinnermi ataatsimiititaliami isumaqatigiissutigineqarpoq. Atuinermi akiliutinut allanut ikiorserneqarnissamik pisariaqartitsineq naapertorlugu isumaginninnermut inatsimmi allami qinnutigineqassapput.

Siunnersuummi § 5 malittarisassanik atuuttunik allanguinerusoq ataatsimiititaliap maluginiarpa. § 5 naapertorlugu *Ineqarnermut tapiissutit ineqarnermut akiliutit, inoqutigiiit akileraarutitigut ilanngaatit ilanngunnagit massakkut aningaasarsiaat akileraaruteqaataasussat tamarmiusut, inissiaq taassumaluaqqissugaanera kiisalu meeqqat 18-it inorlugit ukiullit angerlarsimaffimi najugaqartut amerlassusaat tunngavigalugit maanna naatsorsorneqartarput.*

Akileraarutitigut ilanngaatit ilanngunnagit maannakkut aningaasarsiat akileraaruteqaataasussat ineqarnermut tapiissutinik naatsorsuinermi tunngavigineqarnissaat ataatsimiititaliamit taperserneqarpoq. Tamatuma inoqutigiiit maannakkut isertitaannut naapertuuttumik ineqarnermut tapiissuteqartitsinissaq qulakkiissavaa.

Ataatsimiititaliaq siunnersuummi § 6-imut immikkut oqaaseqaatissaqanngilaq, tassani ineqarnermut tapiissutinik qinnuteqartut paassisutissiisussaatitaanerat erseqqissarneqarluni. Pissutsit taamaannerat siunnersummilu § 6, imm. 2 malillugu *ineqarnermut tapiissutinik pisinnaanermut aamma kommunalbestyrelsip ineqarnermut tapiissutinik naatsorsuinissaanut pingaaruteqartut allangorneri pillugit ineqarnermut tapiissutinik tunineqartoq kommunalbestyrelsimit nalunaaruteqarnissaminut pisussaaffeqarpoq.*

Kommunalbestyrelsi tunineqartup ineqarnermut tapiissutinik tunineqarnissaanut aamma kommunalbestyrelsip ineqarnermut tapiissutinik naatsorsuinissaanut nakkutiginnissalluni pisussaaffeqarnera pillugu siunnersuummi § 7 nutaatut aalajangersagaavoq.

Ineqarnermut tapiissutit eqqortut tigisisussanut eqqortunut tunniunneqartarnissaat ingerlaavartumik qulakkeerneqartassasoq pissusissamisoorluinnartutut ataatsimiititaliamit isumaqarfingineqarpoq.

Siunnersuummi § 8-mi aningaasarsiat killissarisaat ataatsimiititaliap siunnersummik suliaqarnermini immikkut ujartorsimavai, tassami taakku siunnersuummi aammal tassunga nassuaatini allassimanngimmata. Ineqarnermut tapiissutinut piumasaqaatit taakkuninngalu naatsorsuisarneq pillugu maleruagassanik erseqqinnerusumik, tak. siunnersuummi § 5, tassunga ilanngullugit aningaasarsiat killissarisaat, nammineq akiliutissat aamma ukiumoortumik ineqarnermut tapiissutinut aningaasat minnerpaaffissaat annerpaaffissaallu

pillugit aalajangersakkanik Naalakkersuisut siunnersummi § 8, imm. 2 naapertorlugu aalajangersaanissaat siunertarineqarpoq.

Ataatsimiititaliaq aningaasarsiat killissarisaat pillugit apeqquteqarnermigut paassisutissanik sukumiinerusunik Naalakkersuisunit pissarsivoq aammalu ilanngussat isumaliutissiisummut ilanngunneqartut innersuussutigineqarput.

Nalunaarummi atuuttumi aningaasarsiat killissarisaat aalajangiusimaannarneqalersaernerat ataatsimiititaliamit tusaatissatut tiguneqarpoq. Killissarisat taakku ukiuni aqqaneq marlunnik amerlanerusuni iluarsiivigineqarsimannginneri ilanngullugu ataatsimiititaliamit tusaatissatut tiguneqarpoq, taamaattumik siunnersummik aappassaaneerinissamut Naalakkersuisut ataatsimiititaliamit qinnuigineqassapput killissarisat taakku qaqgu iluarsiivigineqarnissaat pillugu aammalu tunngaviit suut kiisalu ukiut aqqaneq marluk kingullit ingerlanerini ineqarnermut akiliutit qaffaavigineqartarnerat eqqarsaatigineqartariaqarneri pillugit nassuaassasut.

Kapitali 2 Aqunneqarnera tapiissutinillu tunniussisarneq

Ataatsimiititaliamit maluginiarneqarpoq siunnersummi § 10 malillugu kommuni angerlarsimaffigisat ineqarnermut tapiissutinik qinnuteqaatinik suliarinnituussaaq aammalu ineqarnermut tapiissutit pillugit aalajangiisuussalluni, tak. siunnersummi § 11, imm. 1.

Siunnersummi § 11, imm. 3 ataatsimiititaliap immikkut oqaluuseraa, taanna malillugu ineqarnermut tapiissutit toqqaannartumik attartortitsisumut akilerneqartassallutik, tamatumalu kingorna taassuma ineqarnermut akiliutit ineqarnermut tapiissutinut naapertuuttumik appartittassallugit.

Oqaloqatigiinnerit ingerlanneqartut tunngavigalugit ataatsimiititaliamit oqaatigineqassaaq matumanit aamma iluanaarniutigineqartarnerata suujunnaarsinnejqarnissaa naatsorsuutigalugu aaqqissugaanera atuuttoq allangortinneqarnissaa kissaatigineqanngimmat.

Ataatsimiititaliaq siunnersummi § 12-imut itisiliissutaasunik oqaaseqaatissaqanngilaq.

Kapitali 3 Utertitsisarneq

Siunnersummi § 13 ataatsimiititaliamit annertunerusumik oqaaseqaateqarfingineqarnani tapaserneqarpoq.

Kapitali 4 Ineqarnermut tapiissutit atorunnaarsinnerat

Siunnersummi § 14 pisariaqartinneqartutut ersarissuseqartoq ataatsimiititaliaq isumaqarpoq.

Kapitali 5 Aningaasalersuineq

Siunnersummi § 15 pisariaqartinnejartutut ersarissuseqartoq ataatsimiititaliaq isumaqarpoq. Taanna malillugu ineqarnermut tapiissutit kommuninit 40 pct.-imik Nunattalu Karsianit 60 pct.-imik akilersorneqassallutik.

Kapitali 6 Naammagittaalliorsinnaaneq

Siunnersummi § 16-imik Isumaginninnermi Naammagittaalliuuteqartarfimmuit naammagittaalliuuteqarsinnaaneq ataatsimiititaliamit tusaatissatut tiguneqarpoq. Isumaginninnermi Naammagittaalliuuteqartarfimmik piffissaq sulianik ingerlatsinermut atorneqartartoq eqqumaffigiaaqqullugu ataatsimiititaliap Naalakkersuisunut kaammattutigaa. Innuttaasut naammagittaalliuutimik suliarineqarnissaanut ukiuni arlalinni utaqqisinneqartarnerat akuerineqarsinnaanngilaq. Naalakkersuinikkut anguniagarineqartoq tassaavoq naammagittaalliuutit suugaluartulluunniit qaammatit arfinillit iluini aalajangiiffigineqarsinnaassasut aammalu tamatuma piviusunngortinniarneqarnissaa Naalakkersuisut sulinutigissagaat.

Kapitali 7 Atortuulersitsineq

Inatsisip ulloq 1. Januar 2016-imik atuutilernissaa ataatsimiititaliamit isumaqatigineqarpoq.

Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasaqarnikkut kingunerisassat siunnersummut nalinginnaasumik nassuaatini nassuaatigineqarput. Tassani eqikkarlugu oqaatigineqarpoq pisortanut aningaasaqarnikkut kingunerisassaasa naatsorsorneranni ukiumut 12,8 mio. kr.-inik sipaartoqartarnissaa naatsorsorneqarpoq. Tamakkiisumik sipaartoqarsinnaanera anguneqassaaq nalunaarut ilaasussaq atuutsinneqalerpat.

Siunnersummi § 15 malillugu ineqarnermut tapiissutit 40 pct.-ii kommunimit 60 pct.-ii Nunatta Karsianit akilerneqartussaammata aningaasaqarnikkut kingunerisassat 1. januar 2016-imit nunatta karsianut ukumoortumik 7.68 mio. kr.-inik kommuninullu 5.12 mio. kr.-inik sipaaruteqarnerannik nassataqassapput, siunnersuullu ilusimisut iluseqartoq akuerineqassappat ataatsimoortumik tapiissutit kommunik isumaqatigiinniutigineqarneranni tamanna eqqumaffiginiarneqassaaq.

Oqaatigineqartut ataatsimiititaliamit tusaatissatut tiguneqarput.

Ataatsimiititaliap oqaaseqaatai eqikkarlugit

Ineqarnermut tapiissutit tassaapput akissakinnerusut inissiami attartukkamiiginnarnissaannut – angerlarsimaffeqaannarnissaannut - tapersiissuteqariaatsit periaatsilluunniit arlallit ilagaat. Bolistöttemut taarsiullugu assersuutigalugu toqqarneqarsinnaavoq periaaseq najoqqutarisassat erseqqinnerusumik aalajangersarneqartut malillugit ineqarnermut akiliutinik

annikillisitsiusarnermik atuineq. 2015-imni aningaaasanut inatsimmi konto pingaarnermi 30.11.10-mi, **Ineqarnermut tapiissutinut** tunngasumi 67.5 mio. kr.-it immikkoortinneqarput. Kommunit ineqarnermut tapiissutit 40 %-it akilertussaammassuk 2015-imni ineqarnermut tapiissutinut 45 mio. kr.-it kommuninut immikkoortinneqarput. Tamatuma kingorna 2015-imni ineqarnermut tapiissutit tamarmiusut 112.5 mio. kr.-iupput, taakkulu nunarput eqqarsaatigalugu annertoorujussuupput.

Ataatsimiititaliap Inatsisartut ataatsimiinneranni matumani siunnersummut matumunnga ilanngullugu suliarai siusinaartumik pensionisiat pillugit siunnersuut UKA 2015/98 aammalu utoqqalinersiaqarneq pillugu siunnersuut UKA 2015/160.

Siunnersuutit taakku pingasut ataatsimut suliarineranni siunnersuutit imminnut ataqatigiinnerat ersarissumik nassuaateqarfingineqanngilaq. Siusinaartumik pensionisiat utoqqalinersiallu allannguutissaattut siunnersuutit ineqarnermut tapiissutisisinnaanermut periarfissamut qanoq sunniuteqassanersut qulaajaqqissaarneqarnissaataatsimiititaliap pingartilluinnarsimavaa.

Ineqarnermut tapiissutit pillugit siunnersuut manna utoqqalinersiat siusinaartumillu pensionisiat pillugit iluarsartuussinermut naapertuussarneqartariaqartoq ataqatigiissaarneqartariaqartorlu ataatsimiititaliap erseqqissaatigissavaa.

Iluanaarniuteqarsinnaanerit qanoq annertutigisumik qanorlu iliornikkut atorunnaarsinniarneqarnersut siunnersummi matumani erseqqissumik nassuaatigineqanngilaq aammalu aningaaarsiat killissarisaat qanoq ittut atuutsileraarneqarnersut siunnersummi saqqummiunneqartumilu paasissutissiisutigineqanngilaq, taamaattumillu tamanna ataatsimiititaliap allakkatigut apeqquteqarnermigut paasiniarsimallugu.

Aningaaarsiat killissarisaat isumaliutissiisummi ataatsimiititaliap oqaaseqaateqarfagai. Iluanaarniutaasinnaaneranut tunngatillugu, siunnersuutip aappassaaneerneqarnerani akissuteqaammi inatsimmi atuuttumi iluanaarniutaasinnaanerata suujunnaarsinnejarnissaanut tunngatillugu qanoq nalunaarusiortoqarniarnersoq Naalakkersuisut ersarissassagaat ataatsimiititaliamit kaammattutigineqassaaq.

Siusinaartumik pensionisanut siunnersuutip aammalu utoqqalinersiaqarneq pillugu siunnersuutip imminnut ataqatigiinnerat pillugu siunertaanngitsunik ajornartorsiuteqartoqartoq 2016-ip ingerlanerani paasineqassappat tamanna kommuninit Naalakkersuisunillu malinnaaffigineqarlunilu aaqqiiviginiarneqassasoq, tamannalu pillugu ataatsimiititaliap ilisimatinneqarnissaataatsimiititaliamit kaammattutigineqassaaq.

Ajornartorsiutit ataqatigiissut arlallit taaneqartut Naalakkersuisunit kommuninillu equmaffiginissaat pingaaruteqarmat ataatsimiititaliap erseqqissaatigissavaa.

Ineqarnermut tapiissutit pillugit iluarsartuussineq manna suliniutinut angerlarsimaffissaaleqilernissamut inissaaleqilernissamullu pinaveersaartitsinermut kinguneqarnerlunnginnissaat pingaaruteqarmata ataatsimiititaliap aamma erseqqissaatigissavaa.

Aammattaaq maanna isertitat naatsorsorneqarneranni oqartussaasut tunniussisussat innuttaasullu nikerartorujussuarnik isertitaqartartut eqqarsaatigalugit ajornartorsiuteqartoqalersinnaanera ataatsimiititaliap siunnersummik suliaqarnermini ernummatigisimavaa.

Taama pisoqarsinnaanera pillugu Naalakkersuisut kommuninut ingerlaavartumik attaveqartassasut, tamatumalu kingorna naapertuttoqanngitsoq paasineqassappat tamatumunnga aaqqiiniartaqqullugit ataatsimiititaliamit kaammattorneqarput.

Kiisalu ineqarnermut tapiissutit iluarsiivigineqarnerat suliffeqarnermi piareersimanissaq eqqarsaatigalugu pisortanit ikorsiissutit pillugit maleruagassanut pitsaanngitsumik sunniuteqarsinnaasoq ataatsimiititaliap ilimagaa. Taama pitsaanngitsumik sunniuteqarsinnaaneq piaartumik qulaajaqqullugu Naalakkersuisut ataatsimiititaliamit kaammattorneqarput, taamaalilluni ineqarnermut tapiissutisisinnaaneq eqqarsaatigalugu isertitatigut iluanaarniartoqarsinnaaqqunagu.

Pisortanit ikorsiissutit iluarsineqarnissaat naleqqussarneqarnissaallu siunertaralugu taakku pillugit maleruagassat Naalakkersuisunit aamma iliuuseqarfingineqalersaartut ataatsimiititaliamit ilisimaneqarpoq taamaalilluni ilatsiinnarluni pisortanit ikiorserneqarnissaq pinnagu sulineq imminut akilersinnaajuaannaqqullugu. Tamanna ataatsimiititaliamit tamakkiisumik taperserneqarpoq.

Naalakkersusut allannguutissatut siunnersuutaat

Siunnersummik aappassaaneerinissamut allannguutissatut siunnersummik ulloq 29. oktober 2015 Naalakkersuisut nassiussaqarput.

Siunnersuummi § 5-imut ilaatigut allannguutissatut siunnersuuteqartoqarpoq, matumani utoqqalinersialinnut siusinaartumillu pensionisialinnut immikkut malitarisassanik ilanngussigallartoqarsimalluni, matumani maannakkut isertitat naatsorsornerini taakku 4. 100 kr.-inik ilanngaaserneqarsinnaassallutik. Allannguummi nalinginnaasumik oqaaseqaatinini allassimavoq, ungasinnerusoq isigalugu immikkut malittarisassat taakku

attatiinnarneqassanersut nalilerneqarumaartoq. Akileraartarnermut ineqarnermullu tunngasuni ataatsimut iluarsartuussinissamut tunngatillugu tamanna nalilerneqarluni.

Aammattaaq § 5-imut nutaatut allannguutissatut siunnersuummi siunnersuutigineqarpoq, illoqatigiit maannakkut isertitaat tunngavigalugit ineqarnermut tapiissutit naatsorsorneqartassasut.

Siunnersuummi § 11-imut allannguutissatut siunnersuummi siunnersuutigineqarpoq, inissiani attartortittakkani ineqarnermut tapiissutit ineqarnermullu akiliutip naatsorsorneqarneranni assigiinngissuseq taamaallaat akilerneqartassasooq. Matumani siunertarineqarluni ineqarnermut tapiissutip ineqarnermut akiliuteqarnermut annikillineqarnissaata qulakkeerneqarnissaat.

Allannguutissatut siunnersuummi aningaasatigut allaffissornikkullu kinguneqassanngitsoq ataatsimiititaliamit oqaatigineqassaaq.

Ulloq 3. november 2015-imut siunersiunermi allannguutissatut siunnersummik ataatsimiititaliaq saqqummiussiffigineqarnissaminut periarfissinneqarpoq.

Allannguutissatut siunnersuut pillugit ataatsimiititaliamit oqaatigineqassaaq allannguutissatut siunnersuut saqqummiunneqartoq ataatsimiititaliamit tapersorsorneqarmat, utoqqalinersiallit ukiumut ilanngaateqartarnissaanik 4.100 kr.-inut qaammammullu 341,67 kr.-inut ilanngaateqartarnissaannik siunnersuutigineqartoq tusaatissatut tigullugu.

Allannguutissatut siunnersuutip aningaasatigut kingunerisassaant tunngatillugu Naalakkersuisut oqaatigaat akileraarutinut ilanngaammi aningaasartuutaanerusussatut naatsorsuutigineqartut ineqarnermut tapiissutinut sipaarutigineqartussanut nikingassutit ilanngullugit naatsorsorneqareersimasut. Ataatsimiititaliap tamanna tusaatissatut tiguaa.

Ataatsimiititaliap inassuteqaatai

Tamanna oqaaseqaatillu saqqummiunneqartut isumaliutillu tunngavigalugit Naalakkersuisut allannguutissatut siunnersuutaat ataatsimiititaliap isumaqtigiiittu akuerineqassasoq innersuussutigaa, siunnersuullu ilusimisut iluseqartoq akuerineqassasoq innersuussutigalugu.

Taama oqaaseqarluni isumaliutissiissummilu oqaatigineqartutut paasinnilluni ataatsimiititaliap siunnersuut aappassaaniigassanngortippaa.

Tillie Martinussen,
Siulittaasoq

Agathe Fontain

Jess Svane

Laura Tàunâjik

Ineqi Kielsen

Ane Hansen

Mimi Karlsen